

Thursday, July 3, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

GST

Ramchhunga state hrang hrang Goods and Services Tax dinhmun tarlanah Mizoram GST chu nikum 2024 June thla chhunga khawn aiin za zela -26 in a tla hniam a, nikum June thlaa GST khawn hi cheng vbch 12 zetin a phak lo a ni.

Ministry of Finance tarlan danin India ram chhiah khawnna atan July 2017 aṭangin GST hman anih hnuah rampum huapa GST khawn chu a pun belh zel a, nikum 2024 June thlaa GST nena khaikhinin a punna chu za zela 6.2 a ni a, sawrkar kum 2025 – 2026 inkarah Sawrkar laipui chuan GST atang hian cheng vaibelchhe nuai 11.78 hmuh a beisei a, kum hmasa lam aiin za zela 11 a pung tura beisei a ni.

Ministry of Finance tarlan danin nikum June 2024 thla GST chhiah khawn zat kumin June 2025-a khawn tling lo state 10 an awm laiin nikum aia khawn tam zawk state 23 an awm a, nikum khawn zat phak lo nasa zualah Manipur minus 36 leh Mizoram (minus 26) chu langsar zual a ni.

Kumin sawrkar tangka kum 2025-26 thla 3 chhung Mizoram GST khawnin nikum 2024-25 thla thum chhung khawn a phak lo nasa hle a, April thla ah nikum leh kumin khaikhinin kumina khawnin (minus 28) in a phak lo a, May thla in (minus 26%) a phak lovin June thla ah (minus 29) in a phaklo bawk a ni.



SWADESH DARSHAN

Swadesh Darshan hnuaia Sakawrhmutuai tlanga skywalk leh Chaltlang leh Durtlang inkara ropeway siam chungchanga thubuui chu Mizoram Lokayukta thupek angin Anti Corruption Bureau (ACB) chuan a chhui mek a, chhui zawh hun tur hriat a la ni lo.

Mizoram Tourism Department thuchhuah tarlan danin Swadesh Darshan 1.0 hnuaiah hian project pahnih a awm a, ropeway leh skywalk te hi project hnuhnung zawk “Development of Eco-Adventure Circuit” hnuaia hna 152 zinga mi an ni. Ropeway hi Durtlang site hnuaia hna 16 zinga pakhat a ni a, Skywalk hi Sakawrhmutuai Tlang site hnuaia hna 19 zinga pakhat a ni.

Department hotute sawi danin he Project atan hian Central sawrkarin Cheng nuai 4953.10 a pechhuak tawh an ti a, a project bultanna atan kum 2017 March thla ah cheng nuai 1981 pe chhuakin kum 2017 september ah cheng nuai

2482 a pe chhuak in kum 2018 september thla ah cheng nuai 489 pek chhuah a ni.

Hna hrang hrang thawh nan hian cheng nuai 9907 ruahman a ni a, heng zinga za zela 50% chu pek chhuak tawh niin thubuai tam tak a awm avangin sawrkar laipui chuan kum 2023 december thla khan he project hi alo ti tawp tawh a ni.

Tourism Department thuchhuah tarlan danin kum 2019 April chhunga pawisa pekchhuah zingah Skywalk a awm ngei an ti a, hnathawk turin contractor pahnih JV NEIP & Ropeway & Resorts Private Limited leh Lushai Engineer te chu rawih an ni a, contractor hian bill an lak tawh bakah heng bill te hi kum 2017 atanga kum 2019 chhung khan pekchhuah vek an ni.

Hetihlai hian Sawrkar hmasa hunlaia Tourism Minister Robert Romawia Royte chuan Tourism Department thuchhuah chu a dik tawkhlo thu a sawi a, an sawrkar hunlaia sum pekchhuah zingah Skywalk a tel ve loh thu sawiin sum dang erawh an pe chhuak a ti a, ACB file ah chiang zawkin a awm tih a sawi bawh.



PEACE ACCORD

Ex-MLA leh Professor (Retired) Pu JV Hluna’n India leh Mizoram Inremna ziah chu Mizote tan a hlut em avangin MZP chauh ni lovin Sorkar, leh Kohhran te nen Mizoram puma lawm a phu a tih thu a sawi.

Akashvani Regional News Unit in Remna Ni chungchanga Ex-MLA leh Professor (Retired) JV Hluna, leh Govt. Johnson College-a Associate Professor, Pu Lalrammawia Ngente te a kawmnaah he thu hi an sawi a. Prof JV Hluna chuan Pu Laldenga’n inremna alo hawna special provision ah chuan Mizote sakhua leh an khawtlang nun te, leh Mizo hnam dan te chu humhalh tur tih a in ziah avangin he inremna hi Mizote tan a hlu hle a, zalenna min pe a, tute tan pawh a ni a ti a. Remna Ni chu Mizo Zirlai Pawl te chauh ni lovin sorkarin buatsaih se, Mizoram puma lawm a phu a tih thu a sawi a, Lawmthu sawina Ni anga hmangin Kohhran tin ten an kohhran chhungah tawngtai inkhawm leh thuchah siam thin se tha a tih thu a sawi a ni.

Byte: Prof JV Hluna

Pu Lalrammawia Ngente pawhin Remna Ni chu India leh Mizoram an inrem theih nan Kohhran leh MZP ten theihtawp an chhuah nasa a ti a, inremna a awm theih na tura mipuite tawngtai nasat zia te leh political party hrang hrang te hmalakna thlirin Remna chu party bil ta a ni lova, tu sual chhuah bik a ni lo tih sawiin Mizoram pum huapa lawmna siam a phu a tih thu a sawi a ni.



PM MODI

Prime Minister Narendra Modi chuan vawiin chawhnu hian Ghana Parliament ah thu a sawi dawn.

Prime Minister hian thu a sawi bakah Ghana khawpui-a Accra ah India mipui te nen an in kawm dawn a, Pu Modi leh Ghana President John Dramani Mahama te chuan ram 2 te thawh dunna tur hrang hrang an sawi dun bak ah hnamzia leh nunphung te ramhmul damdawi leh damdawi dang ah te inremna an siam dawn a ni.

Ram pahnih hruaitute hian insumdawntawnna kawnga hmasawnna a awm zel chu lawmmawm an tih thu sawiin, ram venhimna lam a thawh dunna chungchang pawh an sawi a. Prime Minister Narendra Modi chuan Ghana ram pum chawimawina sang Officer of the Order of the Star of Ghana chu President John Mahama hnen atang in a dawng a, he chawimawina hian ram hruaitu ropui anih zia a lantir a ni.

